

# Finanziaziun equilibrada da la tgira da malsauns

■ (mc) **Cun in'incumbensa parlamentara sustegnida da 53 deputadas e deputads ha deputà Alessandro Della Vedova (pcd Puschlav) vulì adattar la clav da repartiziun da las expensas per la tgira da malsauns en favur da las vischnancas ed a dischfavur dal chantun. Suenter viva discussiun è l'incumbensa vegnida fiersa cun 68 cunter 40 vuschs.** En il decurs da la debatta e sa mussà che la finanziaziun da la tgira da malsauns è ina materia ulti cumplitgada e da pitschna constanza. Tenor la lescha vertenta ston las vischnancas surpigliar 75 pertschient ed il chantun 25 pertschient dals custs restants che na vegnan betg sustegnids da l'assicuranza da malsauns. «La reducziun da las taxas da tgira e pensiun previdas per 2015 en favur dals abitants effectuescha custs supplementars considerabels per las vischnancas», constatescha il podestà da Puschlav *Alessandro Della Vedova*. Per sia vischnanca da Puschlav muntia quai in augment da 35 pertschient. Quai adossament da custs supplementars a las vischnancas saja nuntgiustificat tant pli ch'ellas na pos-

sian betg prender influenza sin quests custs. En consequenza da las novas stipulaziuns legalas lavurian 40 pertschient da las chasas da vegls e tgira cun deficits da manaschi che vegnian la finala er adossads a las vischnancas. Damai che betg tut las vischnancas sajan integrada en in purtader da las chasas da tgira chaschunia quai ultra da quai ina discriminaziun entaifer las singulas vischnancas.

En la discussiun è il moziunari Alessandro Della Vedova vegnì sustegnì energeticamain dad *Elita Florin-Caluori* (pcd Razén) ed *Ursula Casanova* (pld Razén), entant che *Urs Hardegger* (pbd Seewis) ha sustegnì la posiziun da la regenza ed ha recumandà da refusar l'incumbensa.

Cusseglieier guvernativ *Christian Rathgeb* (pld) ha rendì attent al fatg che il cussegl grond haja declerà 2011 valaivla in'incumbensa da la cumissiun per sanadad e socialesser che pretenda d'examinar a moda approfondida il sistem da finanziaziun vertent dals spitals e da la tgira ambulanta e staziunara. En quest connex saja la regenza era vegnida incumbensada d'elavurar in rapport che duai

sclerir sut tge cundiziuns e cun tge consequenzas la finanziaziun dals spitals exclusivamain tras il chantun e la finanziaziun da la tgira exclusivamain tras las vischnancas fissia pussaivla. Las lavurs preparatoricas per questa examinaziun sajan instradas ed ins quintia savair preschentar en il decuors da 2016 in rapport integral per mauns dal cussegl grond.

I na saja perquai betg prudent d'examinar e midar il sistem actual anc avant ch'il rapport saja avant maun, punctuescha cusseglieier guvernativ Christian Rathgeb. El preferescha perquai d'examinar en il medem mument tut ils custs che vegnan chaschunads dals spitals, da las organisaziuns da spitex e da las chasas da vegls e tgira per uschia survegnir ina survista cumplexiva da la situaziun e per pudair sin fundament da questa analisa examinar differentas variantas da finanziaziun. En quest connex possian ins era discuter a moda concreta davart la clav da repartiziun tranter las vischnancas ed il chantun. La finamira saja la finala vinavant d'impedir spustaments da grevezzas tranter il chantun e las vischnancas, punctuescha Rathgeb concludend.